


TEZAUUR LITURGIC

9 IUNIE

ACATISTUL SF. CUVIOS ALEXANDRU DE LA KUȘTA I



MOSCOVA, 2000



Акафист
святому преподобному
Александру, игумену
Куштскому, Вологодскому
чудотворцу

Кондак 1

Возбранный чудотворче и изрядный угодниче Христов, всем с верою прибегающим источая многоцелебныя дары, похвальная восписуем ти, творящи всечестную память твою. Ты же, яко имеяй дерзновение ко Господу, моли спастися душам нашим, да зовем ти:

Радуйся, преподобне чудотворче Александре, пустынный жителю.

Икос 1

Ангелское твое во плоти житие провидев всея твари Создатель, от юности избра ты в жилище

Себе, Егоже тя обителище быти уведевше,
похвальная восписуем ти:

Радуйся, благочестивую родители
благоприятное испрошение.

Радуйся, благочестиваго корене отрасли
святейшая.

Радуйся, от юности твоея Богу послуживый.

Радуйся, воздержанием ангелов удививый.

Радуйся, в молитвах теплый предстателю.

Радуйся, скорбящих скорое утешение.

Радуйся, просящим скорое поможение.

Радуйся, болящим скорый и безмездный
врачу.

Радуйся, земный ангеле.

Радуйся, небесный человече.

Радуйся, сосуде избранный Духа Святаго.

Радуйся, телес наших здравие и душ
спасение.

Радуйся, преподобне чудотворче Александре,
пустынный жителю.

Кондак 2

Видя тщету мирских попечений, Александре, жизнь твою не миру, но Богу посвятил еси, сего ради оставил дом родителю своею и водворился еси с работающими в иночестем житии, во еже непрестанно и благоприятно вопити Ему: Аллилуиа.

Икос 2

Плотский разум отринув и к небесным всю душу вперив, от юности твоея, преподобне отче Александре, горняя мудрствовал еси, а не земная, темже взываем ти:

Радуйся, мудрости небесное жилище.

Радуйся, братолюбия зеркало.

Радуйся, иноков правило.

Радуйся, на скрижали сердца твоего закон Божий написавый.

Радуйся, сам себе и весь живот твой Христу Богу предавый.

Радуйся, ум твой к небеси вперивый.

Радуйся, страх Божий в сердцах твоих до конца сохранивый.

Радуйся, вместо тленных нетленная
стяжавый.

Радуйся, гордость мирскую поправый.

Радуйся, преподобне чудотворче Александре,
пустынный жителю.

Кондак 3

Сила Вышняго осени твое сердце, преподобне
отче Александре, егда на острове посреде
Кубесскаго езера, братии ради неусыпно
труждаяся и различная искушения и скорби
мужественне претерпевая, родил еси дух
спасения, поя всесильному Богу: Аллилуиа.

Икос 3

Имея помышление таковое в себе,
преподобне Александре, яко всякая умрети
имут, благоразумне разсудив краткость сея
жизни и приобретения ради Христа, яко уметы
вся быти вменивый, ныне убо на небесех
безсмертныя насыщаяся славы, слышиши от нас
таковая:

Радуйся, отвергий богатство, яко терние,
подавляющее семена духовная.

Радуйся, возненавидевый то, яко вещество
пламене греховнаго.

Радуйся, блаженство нищеты духовныя
сподоблейся прияти.

Радуйся, восхотевый внити в Небесное
Царство узкими враты и в пространстве стати.

Радуйся, иго Христова благое и бремя легкое
понесый измлада.

Радуйся, не обративыйся вспять в шествии
до Горняго Града.

Радуйся, прежде кончины твоея во
умерщвление страстей облеченный.

Радуйся, во умерщвленнем телеси нетления
ризою украшенный.

Радуйся, богатства негибнущаго в животе
вечнем обладателю.

Радуйся, непостижимыя славы святых
созерцателю.

Радуйся, преподобне чудотворче Александре,
пустынный жителю.

Кондак 4

Буря безмерная лукавых духов
многообразне тщашеся препяти твоему,

преподобне Александре, трудолюбному житию, но ты мужественне молитвою вооружаяся, прогнал еси вся их бесовская полчища, не бояся козней их, но зовый Богу: Аллилуиа.

Икос 4

Слышаще твое терпеливодушное в безмолвии житие, мнози от окрестных стран стекахуся к тебе пользы ради, инии же хотяще с тобою жити и наставлятися на путь спасения, сего ради похваляем тя глаголюще:

Радуйся, целомудрия столпе, имже бесовская шатания искоренишася.

Радуйся, светильниче многосветлый.

Радуйся, яко увядил еси плотская мудрования.

Радуйся, в духовнем мужестве с древними пустынножителю сравненный.

Радуйся, молитвами твоими дивная сотворивый.

Радуйся, господствию духа плоть покоривый.

Радуйся, миром небесным приосененный.

Радуйся, долготерпения искус стяжавый.

Радуйся, земная мудрования презревый.

Радуйся, Единого Бога вседушне поискавый.

Радуйся, сохранивый всечестне целомудрие.

Радуйся, яко раб пред Господом по вся дни благочестно шествовавый.

Радуйся, преподобне чудотворче Александре, пустынный жителю.

Кондак 5

Яко боготочная звезда, явился еси, всеблаженне, в стране Вологодсте, на путь спасительный к вечному небесному отчеству ведущий. Егда примером, верных души назидаю, научил еси благодарно пети: Аллилуиа.

Икос 5

Видевше княгиня Мариа и инии российстии сынове пречудное по Бозе житие твое, Александре преподобне, яко аще и последи леты в новопросвещенней стране Российстей возрасл еси, но древних преподобных отец чести сподобился еси, дарования чудес достойно прием от Бога, того ради научишася пети тебе сице:

Радуйся, образу кротости духовныя.

Радуйся, умертвивый плоть твою постом и бдением.

Радуйся, заградивый уста твоя на глаголение тщеты.

Радуйся, замкнувый уши на слышание душевредства.

Радуйся, умертвивый руце на творение зла.

Радуйся, истощивый чрево строгим воздержанием.

Радуйся, мертва соделавый чресла твоя трудами на нечистоту.

Радуйся, умертвивый нозе к течению на совет нечестивых.

Радуйся, на камени Христовы веры утвержденный.

Радуйся, Божиим свидетельством возвышенный.

Радуйся, преподобне чудотворче Александре, пустынный жителю.

Кондак 6

Проповедник немолчный явился еси всем зрящим тя премудрости евангельския, всегдашняя чистоты и мужественного терпения

исполнена, преподобне, аще и в безмолвии хранил еси в серды твоём сокровище веры, надежды и любви, воспевая Богу: Аллилуиа.

Икос 6

Возсия в богохранимей души твоей истинный боговедения свет, егда начал еси помышляти о создании новых обители при реке Куште, мы же видевше твое, преподобне, не точию о себе, а паче о спасении близких попечение, воспеваем ти сице:

Радуйся, сродники по плоти Христа ради оставивый.

Радуйся, всю надежду на Него возложивый.

Радуйся, любви нелицемерный хранителю.

Радуйся, служителю Божий, о вверенных ти умоляй.

Радуйся, наставниче грешных, к небесным направляй.

Радуйся, не словом, а житием поучай.

Радуйся, нетления вечности искателю.

Радуйся, непостижимыя славы святых в Небеснем Царствии обладателю.

Радуйся, струе, напаяющая благочестием Церковь.

Радуйся, свещниче, непрестанным благочестием сияй.

Радуйся, светилниче, любовью к Богу и ближним светяй.

Радуйся, преподобне чудотворче Александре, пустынный жителю.

Кондак 7

Хотя обещание Богу исполнити, преподобне, приял еси путь ко епископу града Ростова и от него благословение приим, возвратился еси в путь свой, и достиг места к сооружению обители на бреze Кушты реки, водрузил еси крест Богу с радостными слезами воспевая: Аллилуиа.

Икос 7

Новыя слезы радости и благодарения Богу излиал еси преподобне отче, поставив кущу пребывания своего ради и водрузив крест на месте сооружения храма, егда с коленопреклонением и слезами моляся, рекл еси: благословен Бог, Иже показа место, идеже вселюся в век века. Сего ради вопием ти:

Радуйся, древним общежития начальником
уподобивыйся.

Радуйся, истинный Богу поклонниче.

Радуйся, великий Его угодниче.

Радуйся, делателю винограда Христова
неленостный.

Радуйся, благий и верный Его рабе.

Радуйся, данный ти благочестия талант
возрастивый.

Радуйся, в мале быв верен, над многими ныне
поставленный.

Радуйся, горлице пустыннолюбивая.

Радуйся, древо при исходящих вод
насажденное.

Радуйся, грядущая, яко настоящая
предрекий.

Радуйся, душевныма очима выну Господа
созерцавый.

Радуйся, преподобне чудотворче Александре,
пустынный жителю.

Кондак 8

Странно бе видети, како убогий старец един обитает в непроходимей пустыни, презирая видимыя и невидимыя враги и обитель воздати тщится. Мы же очима нашими вся по воли Бога совершаемая зряще, благодарственно Ему вопием: Аллилуиа.

Икос 8

Весь, пречудне Александре, телом и душою посвятился еси Богу, пребывая в непрестанных трудах и молитвах, постех и бдениях, имея по Бозе велию веру и любовь к заступнице рода христианского, Пречистой Деве Богородице, и во имя славнаго Онѣя успения помыслив создати церковь, абие потекл еси ко епископу града Ростова Дионисию. Мы же столь далекий путь зряще, сретаем тя сие:

Радуйся, совершенный в добродетелех человеке.

Радуйся, ленивыя подвигнувый твоими нравы.

Радуйся, кротости навикнувый от Агнца, взявшаго мира грехи.

Радуйся, за подвиги получивый вечная
благая.

Радуйся, щитом веры стрелы лукаваго
разжженных угасивый.

Радуйся, онем главу сокрушивый.

Радуйся, предводителю добрый в пути
спасения.

Радуйся, всем преподобным уравнивыйся
труды.

Радуйся, умерщвлением страстей миру
умерый.

Радуйся, воздвизанием добродетели живый
Богови.

Радуйся, себе самаго, яко агнца в жертву
Богу посвятивый.

Радуйся, светилниче, елеем благодати кипяй.

Радуйся, преподобне чудотворче Александре,
пустынный жителю.

Кондак 9

Всякое естество ангелское удивися твоим
подвигом, яко столь далекий путь прошед, вшел
еси ко епископу Дионисию и от него
благословение и вся потребная на устроение

пустынное получил еси. Мы же прославльшемуся чрез тя Богу взываем: Аллилуиа.

Икос 9

Ветийство человеческое твое о Христе мужество всеблаженне, изрещи не может, яко по устроении обители час от часу преуспевая в трудах, бдениих же и пощениих, тайно

обнажая себе до персей, и тако снедию комаров бывая, от них же неизреченныя претерпевая болезни, плоть твою духови поработил еси. Сего ради вопием ти:

Радуйся, алкаяй и жаждаяй правды, яко ныне насыщаешися.

Радуйся, во всецелое послушание Богу себе предавый.

Радуйся, нищетою твоею Богу Сыну подражавый.

Радуйся, чистоту твою Богу Духу Святому сохранивый.

Радуйся, во плоти ангелски поживый.

Радуйся, воине Христов непобедимый.

Радуйся, куплями житейскими не обязавыйся, да воеводе угоден будеши.

Радуйся, не восхотевый двема господинома работати.

Радуйся, от юности на плоть, мир и диавола вооруживыйся.

Радуйся, сих врагов славно победивый.

Радуйся, отец по духу чадолюбивый.

Радуйся, обитель насадивый.

Радуйся, преподобне чудотворче Александре, пустынный жителю.

Кондак 10

Спасти хотя душу твою, славы мирския всемерно бегал еси, и егда окрестнии народи начаша тя, яко велия подвижника почитати, удалился еси от них в пустыню, идеже Богу, яко в тимпане, во умерщвлении телесе непрестанно воспевал еси: Аллилуиа.

Икос 10

Стена, ограждающая от всех прилогов диавольских, был еси братии, наставляя их, како избегати козней вражиих и како получитьи Небесное Царствие. Мы же, зряще твое отеческое неусыпное попечение, благодарне вопием ти:

Радуйся, душу свою за человеки положивый.

Радуйся, от обители земная, в небесную водворивыйся.

Радуйся, душею тамо, телом zde, духом же всюду призывающия тя посещаяй.

Радуйся, в великих подвизех течение совершивый.

Радуйся, розго, мног плод о Христе сотворша.

Радуйся, грозде духовнаго винограда, питаяй и веселяяй нас.

Радуйся, омраченныя просветивый.

Радуйся, просвещенныя утвердивый.

Радуйся, отрадо к тебе прибегающих.

Радуйся, России на сопротивныя побараяй.

Радуйся, всех правоверных прошения исполняяй.

Радуйся, преподобне чудотворче Александре, пустынный жителю.

Кондак 11

Пение всякое побеждается звездочисленными твоими труды, всеблаженне Александре. Кто бо от земнородных прославит жестокое твое

житие? Кто возвеличит священные подвиги твоя, безмолвие совершенное, смирение нелицемерное, пост протяженный, молитву непрестанную, чистоту по внутреннему и внешнему человеку, за няже сподобился еси со всеми без порока последовавшими Ангцу Божию и благоугодно подвизавшимися пети Ему: Аллилуиа.

Икос 11

Светозарный светильник явился еси, источая многоцелебное миро, всю страну Вологодскую благоухающее. Сего ради от всех стран чада Церкви, стекающиеся, благодарственная приносяще Богу, воспевают ти:

Радуйся, преисполненный всякия благостыни.

Радуйся, милости всякия сокровище.

Радуйся, промысления о людех приятище.

Радуйся, крине райскаго селения.

Радуйся, миро Христова благоухания.

Радуйся, древо чудотворное рая Иисусова.

Радуйся, чаше, изливающая токи милосердия Божия.

Радуйся, чудес пучино, свыше излианная.

Радуйся, иноков удобрение.

Радуйся, всея России укрепление.

Радуйся, смиренномудрствующих славо.

Радуйся, наставниче нашего спасения.

Радуйся, преподобне чудотворче Александре,
пустынный жителю.

Кондак 12

Благость цельбы стяжавшаго, преподобнаго
Александра, почтим сердцем и усты. И во еже
вящшую воздати почесть святыни его,
потщимся всемерно подражати вере Его, всегда
вопиюще, прославляющему святых своих Богу:
Аллилуиа.

Икос 12

Поюще твое, святе Александре, о
призывающих тя теплое предстательство и от
врагов видимых и невидимых, скорое
заступление, умильно молим тя: не возгнушайся
нас грешных, но услыши вопиющих тебе:

Радуйся, яко всякий недуг душевный и
телесный врачуеши.

Радуйся, в невечернем дни Царствия Божия
почиваеши.

Радуйся, злых помыслов прогонителю.

Радуйся, беснуемых скорый целителю.

Радуйся, во гресех закосневших исправление.

Радуйся, немолчный наставниче.

Радуйся, слепым прозрение даруяй.

Радуйся, хромым и разслабленным хождение
исправляяй.

Радуйся, в Бозе нам потребная созерцай.

Радуйся, многих прошения предваряй.

Радуйся, преподобне чудотворче Александре,
пустынный жителю.

Кондак 13

О великий чудотворче Александре! Моление
сие наше прием, умоли подвигоположника
Иисуса, да избавит царствующий град и всякий
град и страну христианскую от нахождения
иноплеменных, от ересей и расколов, и от
всякия напасти, да даст с тобою в селениях
праведных сподобитися нам пети
Триипостасному Богу: Аллилуиа.

Кондак сей глаголи трижды, таже икос 1-й и кондак 1-й.

Молитва

О священная главо, преподобне отче авво, Александре великий! Не забуди нищих твоих до конца, поминай нас всегда во святых твоих благоприятных молитвах к Богу. Помяни стадо твое, еже сам паствил еси и не забуди посещати чад твоих. Моли за нас, отче священный, дети твоя духовная, яко имеяй дерзновение к Небесному Царю. Не премолчи за нас ко Господу и не презри нас, верою и любовью чтущих тя. Поминай нас, недостойных, у Престола Вседержителя, и не престай молиться за нас. Не мним бо тя мертва суща, аще телом преставился еси от нас, но и по смерти убо жив пребываеши неотступно от нас духом, сохраняя и соблюдая нас от стрел вражиих и от всякия прелести

бесовския и козней диавольских, пастырю наш добрый, се бо икона твоя святая пред очима нашими видима есть всегда, но святая твоя душа с небесными силами у Престола Вседержителя стоящи, достойно веселится. Тебе припадаем и тебе молимся вси и милися

деем, еже молитися о нас всесильному Богу о пользе душевной: испроси время на покаяние и невозбранное прехождение от земли на небо, мытарства горьких бесов, воздушных князей, и вечныя муки избавление, и Небеснаго Царствия наследование со всеми праведными, от века угодившими Господу нашему Иисусу Христу. Ему же подобает всякая слава, честь и поклонение, со безначальным Его Отцем и Пресвятым, и Благим, и Животворящим Его Духом, ныне и присно, и во веки веков. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО